

愛日軒稿

二



甯垣善後急務三條 同治三年六月

一急設巡查街道公局以解惶懼也凡兵勇所駐原秋毫無犯而愚懦之民心終惶懼不敢遽作歸計擬請於甯垣五城設立巡查公局遴派嚴重文武大員督同地方官及委員梭巡彈壓遇有不法棍徒假充兵勇滋生事端者立予嚴懲庶通城肅清民疑自解而踴躍思歸矣

一急設清理田房公局以免顧慮也田房舊主冬皆思歸所慮具呈承認無可投遞一經胥吏必受刁難尤恐業為棍徒占據反受欺凌擬請遴派委員

與向為城鄉信服之紳士設立公局凡有呈認田
房者立予查明分別給領庶人有依歸不待招徠
自然旋集矣

一急清釐官洲以資撫卹也向來城中設立同善堂
救生局各善舉皆取給於官洲歲計鉅萬現在諸
善舉尚皆有待而遺黎無食無衣待恤至急又各
洲刈割正在及時擬請遴派委員紳士趕緊清釐
發賣暫充目前撫卹之費庶遺黎既出水火之中
並免深壑之慮矣

請救護被擄婦女嬰弱並寬免脅從呈

呈為江甯克復在即感激自陳仰乞寬免脅從拯
拔婦女伏望

恩施事竊

等籍隸江甯二百餘年沐浴

皇仁安居守分男尚廉恥女尚貞節風俗之隆聞於海
內咸豐三年正月粵逆下竄撲圍甯垣在城紳民
曉知大義咸隨

前藩司祁及地方官辦理民團幫同守禦其先期
出城者不及十分之一因之失守之日百萬生靈
與城俱陷雖當時闔門焚溺與自縊自戕及圖辦

內應為賊發覺慘遭屠戮者不下億萬而被脅沈
陷者仍復不少迨後賊禁稍寬各男婦率冒死乘
間自拔出城其時各鄉四十八社紳民復隨

前江蘇巡撫許 前江甯府陞任江蘇巡撫趙聯
絡團練隨兵防剿並於東北各鄉分設義局收養
難民故凡逃逸出城猶幸有所依托及咸豐十年
金陵兵潰事出不虞城鄉士民逃避無所死亡之
外復被駟脅入城或發屋作工或搬運負載寒暑
無間朝夕不給即今迴計又已四年慘毒情形不
堪設想間有幸逃渡江又皆孑身空手絲粟俱無

餘

道路流離死亡殆盡所賴各地方捐資收養及同鄉親友向在淮揚通州一帶貿易經營者量加接濟餘喘苟延無如歷時太久雖任卹之誼未必遽衰而溝壑之虞終必不免駢首待盡慘不可名聞

大人誓心掃穴唾手擒渠推四十餘里之堅城殲十有二年之逋寇鋒燹全銷坊市如故並風仰大人暨統軍各帥慈祥整肅治軍極嚴愛民極切誅夷俘略應可無虞特克城之日倥偬萬狀玉石莫分崑岡之慘言念及此心神俱飛血淚交下又

甯城所陷上溯兩湖下逮蘇浙數十郡邑紳民男婦無一不有稚弱尤多慘固由於刼數道所望於挽回用敢仰乞

大人俯念該被陷男婦嬰弱等業久沈水深火熱之中自應在曲宥矜原之例

德體好生恩施格外先期遴選素性慈惠員弁與老成紳士隨同大軍入城首擇空宅數十所凡婦女稚弱總數十口分居一宅嚴其門禁量給飲食然後分別以次安置至被脅難民亦乞

俯飭兵勇但凡不執器械俯首乞命者概從罔治

之例則所以上體

皇仁下全民命者在東南全省定必尸祝萬家俎豆百世而曹武惠之恩威不得專美於前矣

[illegible]

甯垣善後首務四條 同治三年秋日

一曰重農農者邦之本也甯鄉農民素安耕鑿不出里門一經流離絕無依託死亡踵接慘不可言今幸猶有存者大抵僅餘一息既無歸資尤無籽種是非力籌賑貸終亦難望旋歸擬乞

俯飭各州縣剴勸各紳董其有江甯難民流落該境者量為資遣俾遂歸來一面於省垣設立公局置備牛種農器口糧席片等項隨時核實散給當此公私交絀之時而遽籌此重大之欸夫固共知其難實則可以約計如先招徠二萬丁每丁給種一

石計需種二萬石每石值銀一兩計需銀二萬兩
十丁給牛一頭計需牛二千頭每頭值銀十數兩
計需銀三萬兩約牛種兩項共需不過五萬兩口
糧農器之費亦如之共需銀不過十萬兩而一丁
以父母妻子計之所活固已數萬由是以時籌備
以次擴充不過兩年而億萬流亡盡還故土功德
之盛莫顯於斯切要之圖莫急於此雖官中正極
吏絀而甯垣為通省所關如合江蘇兩藩司與運
司併力通籌應必易於集事此嗷嗷哀鴻所延頸
舉趾而日夕切望者也至如何核實給散如何分

撥墾種則惟親其事者臨時規畫焉

一曰養士士者民之首也甯省士人向無田產但事

教課生徒與肄業書院故必力砥廉隅而後信從者眾必專心舉業而後進取可期雖迫飢寒務敦節義此當城陷之初數有內應之舉及至潛謀不就遂各冒死出亡困苦顛連已逾十載比聞官軍克復之音誰無先人廬墓之感並奉持行鄉試孰不志切觀光乃聞此次入闈者除俊秀外合江甯府庠及元宵兩學僅止二百餘人較之歷屆鄉闈只得十分之二固緣流離日久業已死亡者多要

由自顧行李拚擋維艱又約計鄉園生機盡絕此
未歸之多士徒教仰羨乎賓興即歸試之諸生亦
皆未攜其眷屬其為繫心故里留滯異鄉求歸不
得之苦衷無所告訴之隱痛真有不堪設想者也
此而欲普廣廈之恩則莫如復書院之舊甯垣舊
設鍾山尊經兩書院以校課諸生額取內課一百
名每名每月膏火銀二兩有零額取外課一百四
十名每名每月膏火銀一兩有零月約需銀三百
餘兩又鳳池奎光兩書院以校課諸童亦額取內
課外課月約需銀二百餘兩兩共月需銀五百餘

兩向取給於官洲典息兩項今典息已無官洲自在若待清釐而後舉則必時日之久羈擬請

恩賜盡復生童各書院先籌三四千金以為半年經費一面

俯飭員董清理官洲以為接濟之需俾復永久之制將見風聲所樹多士來歸即膏火之資為粥饘之計庠序之舊於以完菁莪之德於以普而中澤之頌必先廣播於士林矣又博山園專課經古為陶文毅公所特設其造就尤多膏火尤厚並望普作人之化者以時修復焉

一曰惠工工者財用所從出也江甯土宜首推綢緞
歲出數十萬端值銀千百萬兩因之男務織機女
務絡緯杼柚之聲不間晝夜轉販之利不遠朔南
農末於以相資商旅於以交集物力之盛全賴於
斯衣食之源莫大於此自經喪亂以來久絕工作
之事而世其業者仍思借以謀生習其藝者尤望
資以餬口所懼稅課既重捐名尤多權利已微生
機遂阻擬乞

俯加體恤務外優容凡土出綢緞除例定關稅之外
一切絲捐機捐釐捐等項概賜蠲除俾幸多所贏

餘自必爭先旋復財用由此而漸足元氣由此而漸完是固百世利源之所闢而非徒一日補苴之末務也

一曰恤孤孤者人情所深痛也粵逆占據甯省偽號天京遂凡歷陷名城以及經過郡邑丁壯則挑作先鋒衰老則毒遭屠戮而於所獲子女則皆輸之金陵比昨克復之時又已轉徙他往誠一設身處地為想其父母思念之忱子女流離之慘應必椎心泣血莫名其無可告訴之苦莫由尋覓之悲好生之德於以負天地之和於以傷隱痛所闢為厲

至鉅擬乞

劉諭隨征將士及隨營商賈所得子女悉送官中但
能詢得里居即可分飭認領並乞

函商兩湖

督撫

分諭各官紳量力捐資隨時收贖被

難子女俘畧在楚者分別資遣俾孤幼免流離之
苦骨肉得團聚之歡由此人心大順民氣大和灾
厲不生禍亂不作裁成輔相之宜於斯益著矣
本朝李文襄鄴園尚書督兵衢州凱撤時特有給
還子女之請至今浙人頌之

並聞同治三年十一月間甯城自南門至水西門